

母女檔影寫真慶生日

Mani 囡囡曝光

天生明星相



■ Hanni 遺傳了霍汶希的美貌。

金牌經理人霍汶希 (Mani) 昨日生日，今年收到一份超級特別的禮物，就是跟 14 歲囡囡 Hanni 首次一齊拍攝雜誌封面及寫真。今次是 Mani 首次讓愛女曝光，網民紛紛讚 Hanni 完全遺傳了母親的美貌，是天生明星相：「看來英皇要簽多個新星！」

■ Hanni 快將到外國讀書。



■ 兩母女感情要好，關係似朋友。

霍汶希昨日於社交平台分享「生日彩蛋」，興奮留言：「Hanni 一眨眼已經高過我，已經係可以同我並肩企喺鏡頭面前淡定擺 Pose 嘅少女喇！」Hanni 完美遺傳媽咪基因，首次拍攝封面零怯場，更被 Mani 讚勇敢：「你帶畀我好多驚喜，同我一齊創造呢份獨一無二嘅回憶，係最好嘅禮物！」不少網民都讚 Hanni 遺傳了母親美貌，指她天生明星相，叫英皇盡快羅致 Hanni 做旗下藝人。

兩母女互嗶似朋友

今次拍攝更爆出母女搞笑日常，化妝期間，Hanni 竟然投訴：「媽咪戴假睫毛睇我！」Mani 反擊說：「唔好成日用呢啲樣呀阿女，畀啲面好啱，大佬！」Hanni 即時變臉擺出乖巧樣望鏡頭，更寸媽咪：「有鏡頭對住我就會咁樣。」Mani 無奈說：「你唔好扮嘢呀！」Hanni 不甘示弱說：「你都唔好扮嘢。」最後 Mani 忍不住笑言：「我哋嘅關係真係好好好！」問到第一次影雜誌相有何感受？Hanni 笑言：「好玩！」Mani 大讚囡囡：「佢好放鬆，係個有自信嘅女仔。我最重點教佢人品，因為做乜嘢人都好，人品最緊要。」

今次拍攝記錄兩母女的重要時刻，Mani 坦言對自己和 Hanni 都意義非凡，囡囡快將到外國讀書，今次拍攝成為她們最甜蜜的回憶。問到有何生日願望？Mani 感性望着囡囡說：「新嘅一歲，我最大心願依然係你能夠平安喜樂。」

張敬軒讚零皺紋 陳慧琳歸功冇脾氣

天后陳慧琳 (Kelly) 前晚於紅館舉行《陳慧琳 Season 2 萬人結界演唱會》第 5 場，邀得張敬軒任嘉賓合唱《風花雪》。張敬軒忍不住問 Kelly 如何保持零皺紋？是否因為從不發脾氣？她笑言：「真係冇乜嘢會令我皺。」張敬軒幽默說：「以前我做後輩歌手嘅嘉賓，總會聽到一句說話，今晚終於輪到我講『我從小就聽你嘅歌長大』。我喺後台聽到你每首歌都好感動，多謝你同雷頌德創作咗咁多好聽嘅歌，陪伴我同好多觀眾度過人生中嘅黃金時代。」

一向寵粉的 Kelly 今次演唱會一大焦點是兩條可升降的伸延天橋，既能照顧山頂觀眾，也能近距離與中價位區域的觀眾互動。她呼籲觀



■ 陳慧琳與張敬軒齊穿粉紅色服裝，襯到絕。

眾暫時放下手機，與她一起大合照留念，因為下次紅館演唱會可能又要等 10 年。

黃宗澤蔡潔快閃街市送禮

無綫熱播劇《執法者們》演員黃宗澤、馬國明、蔡潔、陳滢和丁子朗等前日分成三組，到青衣長發街市快閃派禮物，場面墟口。每當黃宗澤見到婆婆與手抱小孩的媽媽就派雙份禮物，還細心將禮物放到她們的手挽袋內，更貼心叫她們慢慢行。期間有市民大嗌「黃宗澤好靚仔」，他搞笑回應：「我唔係黃宗澤，我係吳卓羲呀！」至於蔡潔與丁子朗嘗試走入街市內派禮物，但丁子朗一動身即被市民擠到寸步難行，蔡潔則成功突圍，將禮物派到檔主手上，令整個街市熱鬧非常。



■ 黃宗澤與蔡潔大受市民歡迎。